

海寧渤海陳氏宗譜


254
3815
15

海濱渤海陳氏宗譜卷第二十五

中六十五世孫賡筌重編

十七世孫德錦校刊

原大傳 第十世至十二世



第十世理學乾初先生

先生諱確字乾初原名道永字非元文學覺菴公之季子也覺菴公生四子俱游黌序有名先生弱而才父兄特器重之從伯兄授經鄉賢許同生先生目為小友且指示子弟曰若曹雖與陳生同學不日即當師事之矣其見重于前輩已如此讀書不屑屑章句毅然期至於古之立言者尤厭薄舉業姑為之以副塾課之望皆受知學使者黎許兩公舉茂才廩于庠後遭喪亂敝屣棄之泊如

也明季有勸法吏先生倡義聲額當事當事庇其人欲中先生以
法先生色不為動尋六府劉公雪濤救免事聞輦轂當事與吏俱
坐黜先生亦不色喜早年論學于諸儒中最喜姚江知行合一之
說謂可與孟子道性善同功後與祝孝廉淵遊戴山先生門奉慎
獨之教躬行實踐重規疊矩既而祝以節顯先生則端然長德望
于一鄉皆不愧師門心印所謂其趨一也接引後學娓娓不倦一
時志義之士從遊日衆與兄子潮生爰立輩表章家學酌立族規
講明宗法建遷祖祠宇宗人既庇其材矣其堂寢規模主祔制度
一出先生釐定晚年構地十畝有奇營葬考妣奉其三兄雁序以
祔而已亦置生壙焉令支下子孫艱于覓地者皆可祔入先生蓋

倣古族葬之法以為支分本一血脉相聯生則聚廬而處沒則共域而葬且使春秋展墓時子姓兄弟咸在其酌古準今法良意美皆類此詩文清真大雅寄託深遠其發明理學尤多心得下筆立就無纖毫障翳書法直逼鍾王撫琴吹簫時奏于山顛水涯篆刻博奕諸好無不工自奉教藪山後一切陶寫性情之技視為害道而屏絕之向之勇於一往遇不平而輒發者亦視為任氣而融釋之社集講會以為無益身心每婉辭不赴急病廢幾二十年足不及中庭君子謂不異玄閔之士室所著有大學辨禪障性解學譜葬論喪俗家約諸書其餘雜著不下數十萬言俱藏于家居母喪手寫孝經百餘冊志痛戚友爭寶藏之於戲先生為余兄而五十

年以長余少時每見先生過從先大夫必肅衣冠迎之指為後生
矜式今先生下世六十年矣而古貌古言髣髴如昨詩有之雖無
老成人尚有典型宗之人有仰老成而溯典型者乎則有先生之
遺文在

第十世封徵仕郎贈奉直大夫瞻山公

附長子燾次子熹
孫麟

公諱會永字震孫大叅魯直公之仲子也少治春秋舉茂才入南
雍以積分拔明經賦性純孝年十五遭母丁恭人之喪擗踊號痛
毀瘠幾不起時大叅公作令畿南祖母沈太宜人在堂公居家事
太宜人左右先意大叅得無內顧憂大叅分藩病歸被劾詣厯下
質訊公侍奉往返一切藥餌及對簿皆一手經營大叅病獲痊事
亦大白迨歸里後家漸中落公割已受分之產以贍諸幼弟居繼
母丁恭人喪哀戚如前治兩慈親窳窳拮据成禮泊丁大叅公艱
年已踰艾猶孺慕致毀生平不事生產遇朋友戚党之急飲助不
遺餘力賓至曲盡款洽座上常滿塾中延致名儒丙夜篝燈手自

丹黃甲乙諸子文譽鵲起即諸名士被月旦者往往藉公成名康熙乙卯季弟黃永從弟齊永幼子勲同舉鄉薦丙辰齊永勲同捷禮闈公誨之曰汝輩做秀才若處子今出身事主尤宜砥礪名節勿負主知勿墜祖緒其以正訓子若孫如此辛酉秋偶得脾疾入冬漸甚卒之夕解頤欠伸而逝頃之兩頰微紅肢體溫暖見者異之謂公神仙中人○長子燾字允大次子熹字允文克紹弓冶聲振膠庠兄弟相師友謂口耳之學不足探原本聞姚江黃梨洲徵君講學兩人渡江請益以一其指歸為文一蹈先民矩矱邑中舉文社拔幟者不出二難熹尤雋異年十三遊括蒼適學使者按部至即與試冠一軍遂寄籍焉後以渡江千餘里應試不便復舍去

援例入北雍屢躋場屋愛客有父風銜杯刻燭無虛日樂易可親
喜揚人善論詩力追正始尤嗜昌黎手為輯注刊刻行世○熹長
子麟字履仁倜儻樹立幼讀書漏三下不休母再三命之寢乃寢
夜以為常下筆一洒千言好遠遊結客千里到處有國士之目康
熙戊子舉於鄉兩上春官不第佐粵西提帥幕賢叅軍名騰桂林
象郡間粵歸奉母命需次河干得淮安別駕板輿迎養治行有聲
尋丁艱歸里疾卒所著有履无咎齋詩集四卷纂輯小學說約六
卷藏于家

第十世大司空文和公

附子世安

公諱鼐永字鼐期號學山封少宰定菴公之長子也由邑庠生登順治戊子鄉薦乙未捷南宮讀書中秘召試輒最時相國素菴公謫居盛京封公以本生兄弟與于徙公上書訟寃格于吏議遂瀝血草疏願代父行有緹縈以一女子救父臣荷 聖朝孝治敢惜微軀之語雖不得請然 世祖憐其孝思而不之罪次年以城旦春封公得援贖還鄉國人皆謂純孝所致云庚子晉少司成恭遇 聖廟御極轉侍講癸卯典試西江得士稱雋是年冬擢大司成充纂修 世祖實錄副總裁物望益隆庚戌主武會試旋陞內閣學士一日 上御閣命作大字公伏地伸紙書二帝三王治天下

之大經大法十三字以進 上改容禮焉未幾少宰缺人 上慎

重簡公自右轉左凡六年銓政肅清丙辰總憲西臺滴聞逆初平
蹂躪之後地方凋瘵公疏請蠲全省逋賦以甦民困聞人德焉更
念死事諸臣上表揚忠節一疏 上謂其通達國體優詔答之次

年晉大司空戊午丁封公艱歸里服除正擬赴闕以疾卒于家遺

本上 予祭葬如制 賜諡文和公以文章才品受 兩朝知遇

自少宰歷冬卿不離講筵備顧問 上方倚重而曳履上昇時論

惜之○子世安字子敬號傅岩生而卓犖四齡喜騎馬六齡愛習

國書十九應京兆試中副車越二載而獲雋起家行人考選授兵

垣戊辰分校禮闈旋奉 命使俄魯斯馳驅塞外萬里炎風酷日

掘井而飲并日而食不敢言瘁還朝擢掌刑垣扈 蹕南巡明年
觀察大名以峻直掛彈章謫徙秦中逾年蒙 恩放還不兩月有
坐臺之 命又居塞外者浹歲既而河督檄委南河堤壩諸工工
竣復赴北河皆著勞績辛巳始得歸田築室于吳門之西山上沙
村以文史自娛者二十餘年一日無疾而逝所著有出塞紀畧二
卷扈從紀畧二卷

第十世掌垣陟齋公

公諱黃永字叔嗣大叅魯直公第三子也少穎異十四補博士弟子員康熙乙卯舉於鄉五試南宮不售謁選得楚之安仁令時奉旨清丈田畝公裹糧減從越陌度阡秉公確勘豪黠無并兼良懦無賄累往來供頓不動擾民間八閱月而蕝事頌聲載道大吏上其狀徵入引見邑令入覲自公始丙子分校楚闈得士吳堂等十五人丁丑擢刑科給事中庚辰再晉掌工科給事中居言路六載所言請廣額肅官方疏銓政嚴保舉及澄清大計草除糧規南糧隨漕帶徵諸疏皆切中時弊剴惻詳明不亞古名臣封事悉荷允行 賜宴賜金 御書宸藻寵賚備極優渥一時知遇為從來

掖垣所未有甲申春請假省墓棲息丙舍眠食草土間者踰月不知寒暑之中人遘疾而卒設施未竟時論惜之公仗義敦氣節有進士吳某窶乏遊吾甯與邑令有舊懷刺欲見舍人索金勿與舍人怒搆之令令勿納也公為之言于令令愈怫然公自為投轄款曲臨行厚贈之其任俠豪邁類如此後吳念舊雨效推轂亦不忘國士之報云

第十世司寇丙齋公

附子世儀。孫克鑑

公諱論字謝浮封諭德贈大宗伯簡齋公之長子品貌嚴重望如
泰山北斗然氣度恬和襟期坦白與人藹藹如也少嗜書為文章
極醞邃有聲膠序間順治丁酉年二十二登賢書辛丑成進士康
熙甲辰廷試館選授內宏文院庶吉士改檢討公學有根柢考據
典確 內廷纂修之事不下數十種悉歸公手丁未分校禮闈得
士皆俊髦然落落不競進淹滯木天三十年至己卯 聖廟薦公
宿碩特簡典試中州試竣 敕九列臺垣諸臣甄別主考官優劣
新城王公士正時為總憲昌言于朝曰今科典試公明應推豫省
為冠廷論翕然稱允是年充日講超遷少詹又 特授副憲不務

搏擊而風采凜然正已率屬物望益隆不半載擢少司寇平反諸
獄全活無算時冬部以永定河堤工奉命廷鞫衆務刻深公謂
受勘皆夙望大臣無心獲戾終當荷聖仁寬宥因與同官虛公
推勘據實奏請果蒙俞旨得量從減釋公之正大和平不周內
深文不模稜狗衆皆此類也甲申冬有讞案未當曹司輒歸咎堂
官公與尚書新城王公同日去官歸田後居東郊閑園里社雞豚
村莊花月怡然自適不以得失介意元龍自乙丑入翰林與公同
朝二十年棣華之誼久而彌篤甲申余陳情歸養值公賦閒居屢
從先大夫過閑園尊酒流連翛然有塵外之致然東山養重天下
喁喁望公復起乙酉駕南巡公迎覲天顏應制賦詩上稱

賞賜御書將有枋用之意而年踰古稀遽控鸞鶴中外缺望公雖
老林泉家訓官箴移孝作忠之道時時勵其子孫子孫之能其官
皆公之遺緒也所著有來寄軒集燕臺偶存鈴閣餘吟歸田錄各
若干卷藏于家○長子世儀令海澄多異政澄故兵民雜處漸山
一溪入澄江通鷺島所產材木悉為營弁侵踞且私創津稅漁利
世儀力持之私稅悉草材木盡還民間南靖西天巖山深多虎民
往來結伴持械營弁擒之指為不軌將鍛鍊成獄南靖於海澄為
鄰邑世儀不忍民以無罪死力自請會勘全活數十人一日謁提
帥見俘囚甚眾熟視之中一人曾以他事就質縣庭者知為良民
受誣立白之帥釋之其剛果不畏疆禦類如此他若置烟戶循環

簿設弭盜金鼓樓捐資置文廟祭器難更僕數兩攝龍岩龍溪俱
著循聲海澄祀名宦○世儼子克鑑少有雋才十六補弟子員隨
父海澄通吏治謁選得屯田主事時 孝惠章皇后山陵甫創經
費百十萬緡檔案旁午夜以繼日不假手胥吏匝月奏稿成疏上
稱 旨佐大司空蝶園徐公查勘河工用勾股核算堤埵延袤不
爽尺寸又以鉅錐探隄根深淺以別新修舊築尤灼見無遁形徐
公竒其才與兩少司空擬交章汲引鑑以生母朱病乞假中道聞
訃服闋以嫡母葛年高不復赴補色養備至篤宗誼好施予捐重
貲葺甯學宮甯遇潮災暴骨遍野悉為之掩瘞入省志行誼傳著
有聞遊草杞離集各若干卷

第十世明經子長公

公諱堪永少保素菴公之季子也性至孝年十六能以文章中副車未幾少保公緣事謫奉天全家被遣嚴旨峻切骨肉倉皇無所措公獨鎮靜謂從親塞外生死相依何患焉奮袂為諸子先少保公領之時公已訂婚於徐萬里安置分無還期竟不敢娶堂上欲為公置媵侍公婉辭之居九年遭少保公之喪悲來填膺終日長號踰半載而疾不可為從親地下年僅二十有九又四年蒙恩放還得從少保公歸骨于里而徐貞娥早髻以當門矣子孝婦貞天故艱其遇以作之耦幸歟不幸歟後數十年當事始上聞予旌復其家又公之世父者鄉公諱之邁殉中丞之難事亦相類

第十世明經補思公

公諱奕昌字子榮號補思司李岱清公子弟穎慧經史寓目成誦
操觚授簡思若涌泉弱冠補博士弟子員繼入成均玉峯徐公宛
平王公真定梁公咸噐重之緣以長安險阻翻然歸里長鍵衡門
務以讀書窮理為事嘗自言吾二十歲前所學不越帖括間為詩
詞亦風雲月露而已迨病後以吐納導引留意養生家言始觀道
書厭其膚浮復求之釋氏自金剛楞嚴六祖檀涇三峯雪嶠諸語
錄閱之殆徧頗有所得取舊日詩文盡焚之自喜胃中空洞無一
物酬酢世故於心了無所碍然竊疑儒者體用合一之學不若是
及梨洲講學吾邑聞陽明戢山宗旨始恍然如飢者之得食行者

之得息即古文之學亦從南雷所定有明二川唐宋八家集識古
人傳燈淵源授受之功不可忘也其虛懷樂道如此學以慎獨為
宗嘗論先儒言敬一惟敬則一矣夙邃于易圖書先後天多所發
明所刻有野雁齋集傳信錄諸書德配卓礫工詩詞有俯滄樓稿
歷朝詞滙行世

第十世大宗伯予告清恪公

附第三子世仁

公諱詵字叔大號實齋贈大宗伯簡齋公之第三子而贈大宗伯澹菴公之嗣子也幼端重寡言笑舉動若成人時王母顏太夫人在堂顧而色喜曰是佳兒也吾後其昌乎九歲善屬文舉茂才康熙壬子登賢書受知于華亭沈文恪公丙辰禮闈遂甯張公得卷亟薦以溢額見遺未戌連躋北堂急需祿養赴補中書科中書已巳召試直言政事得失疏特擢吏垣卒未以養親歸旋丁內艱丁丑服闕入都補原職戊寅擢掌刑垣遇事剛果不避嫌怨在吏科則抑國子生贊禮陞職之驟劾都勻府土司承襲之遲而銓政為之肅清在刑科則參陝西省捐項以免官生萬餘家之逮糾蒲臺

令威逼以雪鄉官王觀成之寃而爰書悉從矜慎至次丁留卷一
疏著為絜令黃河閘制一議急下廷臣尤卓識昌言之表表者也
壬午陞大鴻臚奉命祭陵道却餽遺甲申遷少廷尉為文勒
石獄多平反未幾而副憲之命下矣勘正潛江民穆鸞條被讎
汙巖一案擘肌分理駁令覆審時為潛令者即今高安相國朱公
曾以去就爭之者也與公持論若合符契聖祖仁皇帝稔知公
亮直清介宜任封疆命撫黔者四載調撫湖北者三載黔地犖确
而法制未備楚北殷庶而稗政未除公治黔主創治楚主草治黔
執成法治楚相便宜如募民墾荒奏免其升科催嫗育蠶召遠近
觀法教民多樹果木創建營房三千間區別兵民因利開源所謂

創而執成法者也公則行之于黔如借庫帑糶米減糶以平價除
軟擡硬損諸私派以甦困巡閱荆襄險工惰者以勤徧視州縣益
藏虛者以實歲却鹽規二萬金舉墜補偏所謂草而相便宜者也
公則行之於楚辛卯晉大司空察冒破汰冗費壬辰轉大宗伯夙
興夜寐泣事益虔丁酉十二月 孝惠皇太后升遐諸大典禮
公叅訂施行同列羣服公練習掌故云巳亥春忽感時症血氣衰
耗閱三月不視事具疏引退 上慰畱再三公終以病廢固請
特命相國馬公華亭王公至邸第視疾 溫綸纏摯賜予續紛庶
子七月抵里門展墓睦族分賑課文居年餘以 聖廟七袞萬壽
先期入京爲釐祝計不謂抵京後衰症復作 龍馭上賓之日即

公捐館之期炯炯丹忱存歿一致鼎湖飲泣獨遂攀髯古所云乘
尾箕而在帝旁者公其人歟遺疏上 今上皇帝篤念舊臣賜祭
葬如彝典謚曰清恪公性至孝事本生父母父母生養歿葬竭誠
盡敬歸田掃墓猶汎瀾孺慕御家嚴肅五子鵲起科第日勗之以
持盈戒滿趨庭之際儼若廟堂好儉樸不事華飾夏葛冬裘取稱
寒暑僮僕衣紈綺者輒裂棄之清畏人知丁卯分校順天武闈唐
辰會試同考以及稽察錢局之差鞠審祭告之使黔楚之屬吏冬
官容臺之奏銷解冊莫不杜苞苴絕情面壁立萬仞巖巖如也天
姿英邁日手四書五經至老忘疲謂制藝闡發聖賢理解宦成後
猶日操觚作興文教持衡不爽庚辰得會元王君露等二十三人

皆一時俊彥尤負知人之鑒如高安朱公滄洲陳公皆公所特薦而文端沈公則更識之未遇時黔之德新書院楚之江漢書院悉闢而新之躬親督課人文蔚起門生子弟相聚必商確古今旁涉論律岐黃青烏家言所著有四書述詩經述易經述易卦玩辭述通鑑述通鑑纂要律述地理述四書題旨義學訓規研北樓新藝信學齋偶刻各若干卷並鏤版藏于家曰吾不敢當作者任也於戲吾家邀祖宗遺澤壬午癸未之間兄弟子姪官於朝者十人而同祖者公及司寇兄與元龍三人觴詠過從殆無虛月嗣後宦轍中外睽違戊戌元龍自粵入拜冬鄉值公掌秩宗六卿之長兄弟備員其二同列羨焉迺聚首三載公忽引年考終而一老子然獨

存晚晚頽廢蒙 聖天子厚恩五年政府俟以林泉今昔之間感
慨係之茲于蒐輯家乘之餘猶得按公行狀檢公遺藁以傳公大
雅不作音徽尚存能無嗟然高望也乎○第三子世仁字元之號
換吾好學工為文尤喜制藝搜羅披閱竟日忘倦康熙戊子登賢
書時昆季已先後館選及典外郡元之再上公車不第益自奮勵
經史列左旁行庠右兼讀道書涉及算學靡不精曉乙未捷南宮
入詞苑母查夫人病兩目不見元之聞而寢食俱廢陳情乞歸養
有名醫能以神針治療延之疹視則曰年高未易復也先峻補培
元一年始用針而左目明又二年而右目明遠近咸謂元之籲天
虔禱躬調藥餌之所感不僅醫之能事也仲兄歿撫其子如已出

曰幸有成立則兄亡而不亡耳生平真樸無雕飾遇人不為崕岍
被服操履如寒素賢哉元之而天促之年可悼也已

第十世奉常勿齋公

公諱齊永字大年封太常立菴公之長子也英敏有斷讀書穎異文極典贍道勁弱冠即食餼郡庠康熙乙卯亞魁於鄉丙辰聯捷南宮令山東臨邑經權互濟恒得法外意甫下車值蝗災即出庫鏹僱民捕之典守者以考成苦諫公曰蚱蜢蔽天闔邑民命在呼吸緩則無及典守者不能阻決旬捕蝗萬石許臨邑竟大稔公徐以羨餘補庫如額即草去之曰吾取羨以捕蝗也不則旱草之矣邑快手蕭某與僱工婦女姦其子怒詈蕭令往市糴斗米伏道左以襪帶縊殺之使其母控官而嫁禍于鄰某仇殺公庶知其母為蕭之僱工婦即詰之覩其色有異疑焉禱于神空中懸匣中人三

字公悟。訓一斗古之團甲。即今之快手。必蕭某矣。嚴訊之。見兩襪一繫帶。一繫草。取帶驗之。與絞殺帶無異。遂俯首吐實。一邑稱神。舊例收漕在縣倉。撥運德州。公念城西村隔甚遠。詳請徑送州倉。數十里。村民歲省縣倉加耗車費。不貲公私。俱便。報最擢御史。巡視西城所轄。有王某築室。其匠者傾跌死。同官覩王富欲上下其手。公據理力爭。王某身家獲全。陞掌道。承審拒捕盜案。公讞確。按律奏決。尋獲黨反。不肯服。有勸公潤色供狀。或自劾。以免失入之咎。公曰。此罪囚一時昏愚。代人抵賴。法不可撓。甯受處分耳。已而旨下令覆訊。囚始吐先遁。不知情。得援例末減。公竟無罰。其忠直無隱。風節矯然。類如此。卒已擢通參。壬午晉太常少卿。公天

性孝友與人交必誠信急人之難不惜傾囊而服官廉絕一絲雖
經奉差巡鹺課稽錢局俱洗手視事洒然為清白吏居奉常未浹
歲以疾卒于官年僅五十七耳設施未竟又甚惜天之不永其齡
也

第十世郡守香泉公

公諱奕禧字子文號六謙晚卜宅于吳之葑門更號葑叟香泉者公令深澤時憇大忍寺飲泉而甘之甃石作亭其上以比永叔之醉翁坡公之喜雨名之曰香泉因自號香泉翁公翰墨妙當代海內翕然稱之曰香泉先生故香泉之號獨著公性至孝少年夢登宮闕金甲列坐見公起立曰是孝子也自是益勵厥行父司李公遠官頌表公依母沈膝下誦讀承歡後萬里奔喪雖弱齡戚易中禮嘗割股以愈母疾瘡痕垂老宛然又嘗夢昇一樓滿貯隄糜一神人謂之曰供子一生揮洒書法益進詩文益工數躡塲屋起家安邑丞擢深澤令歷戶部郎石阡南安郡守宦轍所至不名一錢

慕公書者填門重貲爭購公資之以補清俸之不足每徙一官垂橐不能成行則多方托鉢踰時而後倣裝公卿士夫雅重公者亦不惜解囊飲助故公屢涸屢潤但終不為裁桑種橘計亮節清風至今可想見也其丞安邑也羣為公惜公曰先儒有言心存利物雖一命之微于人必有所濟吾敢薄丞耶奉公盡職著有勞績公餘營閣三楹取張茂先鷦鷯賦中語顏之曰翩然甚自適也其令深澤也有妖黑氣類犬形夜撲人皆傷公為文牒城隍次日忽大霆擊落北臺亭角妖遂絕畿南患蝗公下鄉督捕飛集如故因齋戒為文告八蜡有甯食我肺腸毋毒我百姓之語蝗皆以一足挂禾穗而死遂大有年邑風俗媮薄輕棄其妻雖老婦尚鬻錢三數

百詳請大吏嚴禁通行八府奉委賑飢贊皇星夜馳赴贊令尚俟檄至公曰是瞽瞍者豈能待耶擅發之咎予自當之不數日徧給數萬人猶有乞食鄰邦聞賑而歸者公急請續撥米二千石又全活數千人其任農部也奉簡董開通惠河使漕糧直抵朝陽東

直兩門櫛風沐雨四閱歲而工竣軍民稱便歲省運費若干其守石阡也郡故荒瘠案牘寥寥經理月餘大綱已立入省謁中丞輒以他郡疑案命公鞫之有清鎮縣誘逃一案公廉得罪人并究出他案誘逃多人發奸摘伏通省稱神已而清恪公撫黔命下循例迴避調補南安其守南安也一以振興文教為任重修學宮纂修郡志郡有道源書院祀周元公惇頤及程大中公晌歲久頽廢公

急謀修之以公務道出贛州訪玉巖先生遺編序而刊之以版付
其後人曰此不獨勗勉乎陽氏亦欲為此邦人士法式耳甫半載
以疾卒于官於戲公之志殆未竟也公氣誼醕至伯兄來深澤病
痢公廢寢食手調參餌者百日終不能起公號痛頌橐囊事石阡
調回治數世宅兆伯木如公未入土公一體厚葬之孤甥沈大成
就婚平陸公備儀物成其聘娶甥婦亡復經紀以膏發其喪無倦
容所著已梓者有虞州集虞州續集春藹堂集未刻者有秋雨齋
集笑門集陳子日紀雲中紀行舍香新牘北行日記葑叟題跋綠
陰亭集各若干卷藏于家石刻有予甯堂法帖等行世元龍少公
四歲角總肩隨甲戌冬公入拜省郎同朝者又九載公之行誼政

事觀記熟悉知其原本經術者深即出身加民往往有卷軸氣今世最重公書而不知行誼政事一一可傳如此又安忍而沒之

又後傳

香泉公行誼具詳前傳然其軼事時時見於他說且有尤顯于今世者即所聞見述為後傳云公書為吾宗第一法家所謂用筆千古不易之正宗也聞之公之丞安邑也自諸生蒙特達知入直內廷數年邀敕用人有多公踰厲風發擠之出為丞故其時推為阮亭高弟其後入拜省郎又屢奉詔作書同官羨若登仙見公紀恩之什公沒且二紀雍正十二年十二月勅以公書勒石為夢墨樓帖十卷于內府純廟乃以張氏天瓶汪氏時

晴鼎峙馬事紀余翰林秋室集跋語中嗚呼隴廡一夢誠異徵哉
乾隆年來海內爭購公書致故鄉幾無遺墨而贗本充斥近二十
年吳下都門價更十倍書賈云高麗館乃渴求之雞林見重久而
彌篤又如此故老言予甯帖本一巨公所刻贈未幾舟行而石沉
江故原搨流行甚少定武遺碑知出何年今則蘇杭皆翻勒矣若
公學行名人偉士已皆推重當時即出身加民有卷軸氣話亦王
孟津贈文非晁弟私言也其稱于後世如山西通志載公 崇祀
名宦又稱公嘗倣文選體集歷代詩文為文海序而行之公遺書
更有樂回笑門等集今並行世子世恭書亦道勁有法度非世俗

書刻有十壁樓墨搨

第十世封兵垣贈副憲宋齋公

公諱訐字言揚贈大宗伯簡齋公之第五子也博聞強識言動皆有法則十一補博士弟子員明年就甥館為太岳黃文僖公所器重夙夜潛修學業日進與許宗伯張戩侯諸前輩同時食餼文名鵠起未幾姚江黃徵君梨洲至甯講學公預司講精研性命之旨為徵君高足弟子并以籌算勾股之術傳焉承父命析居海鹽即鄭端簡公故宅因以師簡顏其堂力崇儉約以導鄉黨初授甯海訓導游吼山謁禹陵渡曹娥并與好事者直窳赤城瀑布宦情甚淡自以為生平勝遊賴此一出所至必紀以詩旣晉涪安教諭拔士方文輒若芳兄弟後皆以文章名於時提唱學者必先行而後

文士風翕然丕變間有不率教者開導再三榘楚收威其人翻然
卒感之如父母秩滿陞温州教授子世儒輩先後登甲乙榜公遂
告歸杜門常舉柳氏家訓門第高可畏不可恃二語刊置座右日
朝子姓而訓誡之與許宗伯為娛老會一時過從如楊崑木曹希
文即少年壇坫中人尤一時佳話雍正辛亥世儒由中州入覲蒙

世宗憲皇帝垂詢公年

御書松柏堂扁額并人參貂皮甯綢

等物以賜年高德劭上邀

九重錫類人以為庭訓義方之驗云

公性至孝痛簡齋公未屆古稀因繪夢萊圖以志感晚年猶展卷
追慕讀書鄙章句嘗論甯鹽海塘形勢不同甯塘宜于塘外排椿
設櫃以護沙鹽塘宜于塘身縱橫疊砌以固土又論浙西水利有

上河下河二水下河兩支易明惟上河兩支宜開濬故道設壩束水以直通黃灣皆濟時碩畫當事恒就公諮訪平居尤講求荒政以陳幾亭先生集為最善世倭分賑東安遵其法行之而利則提命之成效也文章峭厲淡宕詩喜韓蘇而尤服少陵先選宋十五家詩以矯世之偽為唐者復選唐省試詩及杜詩以救世之托為宋者與自訂詩集及勾股述勾股引蒙諸書俱鏤版藏于家先是先公經紀高曾墓產撙節贏餘一千八百緡更迭交代者數矣後公董其事以積貲置產百八十畝歲收租入贍支下之貧乏者俾祖澤利賴永久此尤敦本善後之舉特書之簡末

第十世 予告大學士 謚文簡公

公諱元龍字廣陵號乾齋容菴公長子也天資純粹湛深經術少時與人接便饒氣度樂道人善煦若春風弱冠試成均宋文恪公一見器重中崔屏選僚壻如婁水相國且折年位下之康熙戊午登賢書乙丑會試廷試並第二人起家編修以文章受知 仁廟時初設 南書房慎選供奉自張文端勵高兩文格外雖九列大臣不得與公特被 召入有所撰擬必稱 旨已已扈蹕吳門內艱聞訃會有勘高士奇王鴻緒植党營私者并及公謂與士奇結為叔姪並 詔休致公奏曰臣族本由高繼陳與士奇叔姪譜籍可稽且使臣果結彼為勢利交安得命之為姪 上意乃釋服闋

補原官甲戌殿試進呈卷上 特宣二三親信大臣入公以翰編
得與同列榮之 上得顧悅履名以問大臣對不知即問公爾同
鄉其人何若對曰真讀書人惟閉戶故少知名遂定第三公與顧
素無親交然不避嫌不蔽賢休休之度有如是者是歲遷轉講讀
賜鳳池良彥額并 御書一卷自是倮直扈從無虛日歷遷侍
讀學士公方志切循陔 仁廟知之會奏對便殿欲書堂額以
賜 恩命自擬公以愛日二字進即面書 賜之旋以少詹充經
筵講官啓沃是歲復陳情未便適年乃以正詹乞養蒙 賜人蔭二斤
御書三額及他賞賚凡所以優老飾終於公父率皆逾等己丑
免喪公猶以餘慕歲餘未出 特恩即家起掌院學士仍侍 經

筵教習庶常尋轉少宰公素以汲引人才扶植後進為已任至是
月旦持衡風流宏長士林仰公如泰山北斗海內翕翕然望公為
霖而棘槐達尊亦皆帖心拭目置公皋契間也 仁廟察公為少
宰能其官有大吏才 命撫粵西粵以瘠土而近邊徼公首務養
民繼以化俗重農積粟建學宣諭三年而民懷生又三年而民向
方重建興安陔河悉復漢馬援唐李渤故制會審三水流民同事
者欲深致之公曰 聖天子不忍一夫之不獲奈何不為請命疏
上悉全活之入 覲晉大司空裁靡費蠲贖累於南北河務悉心
諮度浙江海塘建議與朱文端公合 上用其法浙人歷世永賴
轉大宗伯未久 仁廟登遐公攀髯莫逮以原官侍奉 景陵朝

夕依戀 憲廟鑒公忠誠己酉以元旦入朝即秉鈞衡蓋至是而
海內之望公者果副所願也而公年七十八矣癸丑抗疏請休
上勉俞晉階太子太傅 恩命公子隨歸侍養并 諭起程之日
賞給酒饌果品着六部滿漢堂官餞送 陛辭 御書林泉耆
碩額以 賜復親解 御用數珠拊其肩挂之近侍扶掖以出
高廟登極薦念舊臣即家 賜給一品全俸疊 頒上方珍品公
薨而褒終之典畢備壬午以後 內頒墓祭四次並 國史立傳
所以寵異公者三朝同揆焉公生平以無忝所生夙夜匪懈兩言
為紳銘故其立身大節超邁等倫卓卓可傳如此歸老之年猶勤
輯家乘增捐墓田釐定規條手書簿籍孜孜不倦書法縝密道勁

無饒逸氣名達

宸聰

仁廟嘗令就

御前書擘窠大字深嘉

獎焉所著如奉

勅編進及在廷與修諸書外又有格致鏡原一

編久邀

睿鑒藝林爭寶之並愛日堂集行於世

論曰聞公生甫歲餘每午夜聞誦佛號夢寐中必合十起跪太夫人陸拊而祝之乃不復爾公其夙世有隱行歟何福之厚而遇之亨也性秉中和萬生盛世進稱太平良相退為宇宙完人誼薦友于撫孤姪俾成厥名雖大位不忘布衣交後生寒畯丐之聲華而掖以上進者比比也非甚盛德大度曷克臻此仕途坦夷老瘠枚卜引年頤養以至於考終仁人所履無陂不平非信然耶晚營宅兆猶傍松楸公蓋終身孺慕矣

第十世萊州郡守任齋公

任齋諱謙字廷益贈大宗伯簡齋公第六子為人虛止靜默甫就
藝攻苦不少懈弱冠後遊庠食餼文聲日噪子舍恪勤居喪致毀
服闋奉遺命居杭之梅東里九蹈省門嘗題詩舉子屋壁曰寰海
吾伊同此夕名山甲乙任他年時康熙癸酉中秋也是冬就教甯
海旋謁選得員外郎擢郎中迴翔戶刑二部凡十年為京江相國
新城司寇所引重有劇務輒以委任之出守萊州立綱振紀防海
則設團練之法與水師為犄角治河則仿竹落之制貫衆石以禦
衝他若建倉貯穀構厰校士重修郡志皆捐重貲為東萊久遠計
署有老槐歷久不生枝葉忽抗莖垂條歲加茂焉羣目為神槐且

謂古者樹槐聽訟實賢守政簡刑清所感名在官之日賴德配沈
宜人居持門戶遠報最晉秩臬副值宜人訃音至悲不自勝遂
賦歸田段橋之東購莊一區乃董文敏別墅因懸文敏所書浣雲
館于閣而以就莊顏其門曰是菟裘也吾將終老矣或泛扁舟或
乘籃輿酒盃詩卷彷彿香山洛社蓋二十年焉生平不妄接交擇
言而道家居後當事過訪或歲端月吉一詣公所鄉邦利弊亦不
以局外緘嘿如西湖之泉流入湧金門者自將軍駐防營內盤曲
而出武林門至響水閘啟閘則水落上塘由東新關直達海甯乃
兩邑灌溉之資時營內水道淤塞力請中丞移咨設法開濬營內
得通舟楫明年秋旱致書邑令曰白太傅所謂啓牒一尺值黃金

一觴正此謂也父母曷不為民請命開響水閘放水尺許乎令從之是歲旱不為災又西湖沿涯曠土奸胥私佃于民給佃帖收稅托名抵江田缺額其實江田之糧尚未豁也昌言于撫軍高安樂公檄縣勘追佃帖而私佃之弊遂革湖民便之其利益桑梓類如此晚年有詩二卷古文一卷藏于篋衍強半皆莊中所著

第十世禮部郎峻齋公

公諱嵩字巨高號峻齋文簡相國季弟也少穎異至性過人年十四補博士弟子康熙丙子舉于鄉癸未成進士授刑部主事尋陞本部員外郎刑部視諸曹事較繁爰書所成動關民命公初任時即矢冰心絕弊竇詳晰律例而以經術輔之遇所矜哀必反覆詳慎求其可出之路至無可回而後已至于罰當其罪雖勢力情面不能斂也由是同僚敬憚姦胥無能上下其手有奸人倚豪家勢謀奪人婚力為判完原配盜誣良民廉得其情釋之邏卒斃人蘆溝橋或陰左右焉不聽卒抵于罪繼陞禮部主客匝月即乞終養外艱服闋補祠祭在任一年典禮脩飭值高麗入貢使例有私覲

公峻拒之一無所受壬辰充會試同考官矢公矢慎所拔皆一時
之雋時三河城垣傾圮部民以公名上請奉命偕滿侍御溫公
同往公鳩工庀材必親自簡閱又重惜民命其應予工直甯浮無
減人人樂為盡力年五十六歿于京邸道路哀之

第十一世處士適齋公

公諱源世字子遠東園公第十一世宗子也讀書好古蚤歲補石門諸生即棄舉子業折節于詩居恒慕高達夫之為人故以適名其齋自漢魏以迄前明無不舍英咀華辨其體格辭意之所至性好遊覽嘗由閩歷燕出居庸望雲中過雁門陟太行足跡所過即境會心又博采風謠以擴聞見歸而啟門却掃日從事于三唐兩宋間遊蹟不逾五百里鷲峰虎阜間時一寄歷而已年九十三考終行世有秋山吟秋水篇富春檣李二集緩帶樓襟詠諸刻皆其中歲之作也許安陽三禮序之楊艾田雍正建為之跋

第十一世文學補菴公

補菴名枚世字爰立文學腹貞公之中子也自理學乾初先生以孝友篤行振起鄉黨間諸子姪奉圭臬焉補菴其白眉也乾初公深器之嘗勗其子敬之曰爾他日能師法爰立兄一二便佳大小阮針芥可想見已補菴歲十七補郡學弟子員旋丁明季喪亂即棄去與龍山一二執友為省過之會稽其日史所錄過之多少而次其賞罰鈎瑕摘類甯過受罰勿輕受賞父晚年病風攣不能行動補菴謝絕一切晝夜侍寢處一逢危劇便震恐哀悼如不欲生五六年如一日兄弟間悃厚雍睦益怡怡而兼以切儆者尤與從兄潮生從弟敬之兩人互相切劘嘗與敬之書曰聖人論達質直

好義即繼以察言觀色慮以下人慎勿謂質直好義便可徑情一往其生平持躬接物得力于此數言者多早年畧涉治生之學既謂其害道輒屏棄之無何鰥居子女幼不得不問米鹽却洒然於中不為物役同學皆嘆為難及見義必赴然亦稱情量力未嘗好為苟難緩急叩門必應不責其必償間償亦不辭容體修整言辭清辨溫恭廉隅望而知為正人君子坐一室圖史几硯陳設楚楚窗外植一蟠柏吟嘯其中更字霜柏子屬執友許大辛作霜柏說既而語許曰吾所謂霜柏將用霜以勵柏而非敢恃柏以傲霜今子之文得無勵柏之意少乎吾滋惕矣其終身自治之嚴如此工詩善書率皆渙發于性靈而一就夫古人之繩尺年四十二而卒

乾初公哭之慟有詩懷之曰至今思孝德是處有深情渺矣吾爰
立賢哉莫與京

第十一世處士敬齋公附子克豐

敬齋名翼字敬之理學乾初先生之子也初讀書質稍魯不甚當
父意然至性過人嘗侍母鼓疾目不交睫者三月母將歿曰爾誠
孝若此必非不識字者奈何使爾父終日歎嗟我死爾當努力讀
書敬齋涕泣受命時年已十九矣即從苦次發篋無晝夜讀之二
十三作詩古文潛携以就正父執一日父執颺言曰陳敬之當是
文章作手父始索文觀之亦為驚喜性極平恕遇公正輒義形于
色一介不苟取有宗人中落售產二百餘畝以敬齋長者免其介
紹例得酬金數十緡固辭不獲則以與售者之子俾續堂上甘旨
費其耿介類如此乾初公晚年病拘攣必抑搔拊摩方少安飲食

起居悉需人敬齋臥床第旁晝夜不離隆冬盛暑微聞聲喚即起立問所需十二年如一日君子以為難弟患癰潰決日親洗拭之至觸穢氣生腰疽幾不起弟歿為弟嗣從姪以慰嫠婦析已產與之并撫其孤女生平為文章由穠郁而蒼老而清真計古今體排律絕句約萬首賦序論說傳記書贊雜文約千首嘗論學者讀書時不可著一毫已見作文時不可著一毫規撫古人之見非深於文者不能為是言也然終不以文炫世無心進取畢其身不赴一試樵蕪不爨而已里中尤以是高之先大夫嘗延致敬齋課弟姪輩時與余同研席唱和極多故余知敬齋最深○子克學字震修性度恬和春風煦人望之若有仙骨祖彌皆高隱至克學始習舉

子業資極敏尤謙謙受益構藝皆卓絕及門膾炙之以獲售者數
矣博洽宏贍發為古文辭尤耽詩接少陵正脉八歲時即作冬夜
懷祖父詩乾初公欣然和之亦其夙成然也應童子試輒前列受
知于太府馬公見五拔第一有浙江才子之目遂入泮三十後遊
京師游大名出居庸關遊東萊遊南昌游襄陽最近者京口登臨
眺覽詩文日富然數奇終不得自售晚更好道自號雲怡子取陶
貞白嶺上多白雲祇可自怡悅意蓋其所得遠矣生平事母至孝
省覲歸悉解游橐供堂上不畱私蓄人謂其能養志與人交敦誼
薄財有新安吳友負會鏹百緡沒齒不以挂口吻間客京口時常
讓館席於楊孝廉耐菴楊甚德之所著有雲怡詩草各若干卷杜

第十一世侍御梅谿公

公諱勲字允升號梅谿生而靈異經史過目成誦弱冠補弟子員康熙乙卯登賢書聯捷禮闈廷試授中翰尋改就輝令舉廢釐

弊政望卓然丁卯分校文武兩闈卓異陞牧綏德內艱服闋補任階州階自吳逆變後初入版圖又值討葛爾旦用兵軍需孔棘君供億綽如行取工部員外歷刑部正郎隨補授浙江道監察御史歷豫青冀雍諸道前後條奏數十疏無不稱旨明年巡視西城筦登聞鼓點北闈內監試掌京畿道勑姦擊猾一時側目未幾以意外事波及遂拂衣歸卜居安戍門外之西莊息影田園杜門却掃與許宗伯時菴楊中允晚研查太史他山作者英四老會於也

叫園觴咏連朝遠近竊擬香山洛社云公閒居無他嗜以筆墨自
娛左圖右書蕭然物外雅善丹青遇風日清美筆硯精良潑墨吮
毫隨意構結雲山水樹點染處意匠經營不為凡筆四方持繡素
者踵相接未嘗以應酬為倦卒年八十七而貌如童顏神明炯然
雲烟供養之語洵不誣也

第十一世明經省齋公

公諱世倣字賓之號省齋少司寇丙齋公仲子也自秀岐嶷侍大父簡齋公讀書郊園師友如黃梨洲萬克宗范北溟諸先生皆為忘年交相與證難今古究天人性命之歸靡不探其奧突得家傳蕺山之學課兩弟世倬及銓晨夕討論俱以文名世公以早歲蜚聲譽序旋貢成均蕭然引歸不以俛得為榮僉憲查公王望見而異之曰此玉潤也許字以女當是時司寇公官京師伯兄世儀令海澄叔弟世傳教義烏公以仲子代家督綜理內外燦如秩如康熙戊子甯邑大水已丑又遭旱魃公倡義賑糶存活無筭尤慮族人不能給以祭產所贏分上中下三科計口而授法甚簡而人徧德

焉相國文簡公時為吏侍遺書曰吾姪有范文正之風而不居其名尤人所難者太傅文勤公以東撫歸里裒所著文索訂公正色曰弟氣度沈厚必成偉器太上不朽立言為次當從事性命經濟之學勿以寒畯爭長太傅唯唯不忘其贈人以言如此查太史夏重詩文震一時客有挾顯者書往于太史晚視曰郎君從來梓來不攜陳省齋一紙書奚丐此齷齪者為客逡巡袖械去士林至今以為佳話海昌故瀆大海舊塘日圯公杖策規度著為圖說撫憲朱公軾就詢草廬採以入告厥後大工聿興子州司馬鈞繼志投効時艱鉅匄午欽命督修大臣嵇隆汪張偏鍾數公爭倚如左右手凡有諮詢鈞即手畫口陳若出成竹未登仕版即膺恩

命加級紀錄實公之遺澤也蓋公雖不仕于時其經濟碩學夙為鄉黨推重非一日已晚舉大賓不就以經史自娛著有易理鈎元等書藏于家

第十一世廣文鶴洲公

公諱琰字牧初號鶴洲生有異稟明敏殊絕十歲擅詩文有神童
之目十五賦采芹文望卓然既入都補教習康熙戊子捷京兆賢
書旋考授中翰南宮屢躋遂席岷之廣文岷故浙東僻邑風尚樸
陋廟堂禮器祀典儀文皆沿習無所修整公遵規飭矩極力釐新
諸生以文字就正者優不故抑絀不故譽必指陳義理剖析文律
開示諄復聽者無不得其意以去在任十三年文教蔚興士風振
刷詩書弦誦之澤汎布黌宮歸田後日與諸羣從及舊交一二輩
留連山水嘯傲琴樽有耆英洛社之風平生無他嗜好惟沈酣典
籍永夜蕭晨一編不倦著有永言堂詩文集若干卷藏于家

第十一世建昌郡守識菴公

公諱世儁字蘭侯號識菴大宗伯清恪公嗣長子也稟姿純粹五
六歲即解悟名理事清恪公及母查太夫人竭盡孝道年十六補
諸生每試輒入高等平居肆力于文中宵鍵戶獨坐沉思博覽凡
宋元以來理學諸家之說及前輩大家名稿無不丹黃甲乙各有
定本康熙壬午登賢書丙戌成進士授刑部山西司主事陞本部
江南司員外督捕司郎中歷任凡五載公以秋官為刑法重地任
事故慎務期平允不敢屈法示恩亦不肯以深文入人之罪每退
食嘗謂人曰刑官要使天下無冤民嚴刑峻罰之下何求不得壬
辰奉命出守建昌建昌為西江劇郡統屬五邑民喜獄訟鼠牙

雀角之舉相習成風公蒞任恭儉自持剛正馭下一時刁頑相顧
失色未逾年訟獄哀息人情洽和郡風為之丕變待屬吏不設城
府一以至誠接之由是闔郡吏民畏其清嚴而又樂其溫厚時南
城令缺官公奉憲檄往視事邑故多逋賦民困不能償積日累月
數且不貲當事者日事敲朴民益無聊公顧之惻然曰是皆吾赤
子也奈何太守至而令若是乎乃悉捐已貲代償諸逋賦且虞後
之仍即凋敝也於是鄉保里甲南糧正供丁徭催科諸善政次第
舉行至今永以為法西江為人文淵藪歲科兩試五邑之士詣郡
試者率至萬人公遇試必親臨閱視搜剔積弊一時錄取皆寒賤
積學經明行修之士先後繼登科第且有躋清要者咸服公能知

人躬執羔雁願北面就弟子之列壬寅冬 聖祖仁皇帝龍馭上
賓清恪公同日薨于京邸公聞訃馳歸戚禮並至丙午復遭查太
夫人喪公治喪葬畢遂不與世事暮年尤好黃老之學即里居東
偏闢小圃構亭其中四面蒔花果竹木累石為小山日坐卧其下
圖書茗椀悠然自得嘗曰吾先人大事已畢向平之累亦復粗了
家事吾不復相關矣第吾家世受 國恩方今 聖天子在上重
熙累洽子若孫輩宜令苦志讀書修身立德以圖報効吾年已六
十齒髮就衰無能為役惟思一彈再鼓咏歌大平遊神于廣莫之
鄉以終吾歲耳卒年六十四

第十一世廣文毅菴公

公諱世傳字開之號毅菴少司寇丙齋公叔子也少負奇氣孝友
性成湛深經學不屑規守章句蚤饒弟子員棘闈屢放旋筮義烏
秉鐸勤于考課禮肅規嚴而宏獎風流一時造就甚廣會東陽宰
以拙催被劾上憲委公監收公懲勸並施輸稅踴躍宰賴以全尋
又奉令賑歉東邑公按丁核戶使豪胥蠹役莫得舞弊以是解任
之日士民遮道泣下勒石齋署以誌弗諼歸田後寄情詩酒不復
作出世想然遇邑中利弊又侃侃不阿務使有裨桑梓不徒作石
隱流也先世南竹風山二公墓田各支輪年部理自文簡公歸里
知公有幹材委公綜核公不辭勞瘁經畫區處清理租額整飭祠

字以其贏廣置田若干畝而族中之冠婚喪葬又飲助所不及在
已則絲毫無所苟噫即此足以覘公之平日矣

...

...

...

...

第十一世副憲存齋公

公諱世儒字公佐號存齋教授贈通議大夫宋齋公第三子也自少時個儻有大志讀書慧悟過人康熙乙酉舉于鄉越四年己丑成進士授戶部河南司主事歷陞湖廣司員外郎山東司郎中文數年考選吏科給事中旋掌兵垣復以尚書張公伯行保舉稽察寶泉局在諫院十載所知靡不盡言如疏請錢局飯銀宜照銀庫水脚贏餘宜充兵餉又請免奏銷案內漕運脚費部駁咨追積款以廣皇仁嚴覈京驛馬匹實數以杜侵冒先後條奏數十事輒蒙俞旨允行後奉命運米十萬自湖南抵通州官民稱便遂出為河南管河道調南汝道雍正初降補開封府知府旋陞開歸

道 上以公志節剛正擢河南按察使兼署布政使正已率屬讞
獄詳明多所平反在任八載吏畏民懷辛亥入 覲奏對稱 旨
壬子丁宋齋公艱甲寅服闋 特起為都察院左副都御史兼任
順天府尹公以叨荷 主知不次拔擢益自刻勵剔奸扶善臺紀
肅然凡有裨于國計民生者直陳無隱 上知公清直每嘉納焉
乾隆初告病歸宦橐蕭然一如寒素念鹽邑志乘久廢因與錢觀
察元昌悉心採輯又為藝文續編以誌文獻皆具有成書癸酉以
疾終壽七十有九

第十一世績溪令玉圃公

公諱岫字單升一字丹聲號玉圃由鹽庠舉康熙乙酉鄉試天姿
穎異博洽書史一第後屢躋南宮士林惋惜考選中書科中書外
補江華令甲辰丙午兩校省試共稱得士蒞任五載歷署永明甯
遠所至有聲告病復起協查江南錢糧事竣補績溪令調署歙篆
地羶好訟以強項罷歸著有養中堂集營溪治餘珠林若干卷

第十一世少宗伯匏廬公

公諱邦彥字世南號匏廬幼靈敏讀書目十行下年十三以餼廩入成均康熙壬午舉于鄉明年成進士授庶常入直南書房以詩文蒙 仁廟賞鑒而書法尤極當 聖心 溫旨褒嘉 殊恩重疊同官莫不羨為異數旋以慈闈苦節上達 宸聰 御書節孝二字褒之又 賜春暉堂額戊戌歲以侍讀學士丁內艱服闋補原官恭遇 憲廟登極奉 旨與虞山蔣文肅公為圖書集成館總裁悉心蒐訂稱美備焉丙午星誤鐫職遂杜門却掃時甯邑城垣頽圯河渠壅塞公捐貲八萬金以資修濬繼有潮患又傾已橐築尖山等塘以全民命其勞心 王室不以朝野互異有如是丙

辰 高宗純皇帝御極特 命繕寫 御製詩 詔復原職行走

內廷仍充講官兼 五朝國史館纂修凡 內府書籍 秘殿

珍藏悉俾筦鑰未幾洊陞禮部侍郎奉 命祭告暨無間又至朱

華山為 皇七子神牌填青數年間扈從凡二十七次 寵遇之

隆一時無兩辛未仲冬恭逢 聖母皇太后六旬萬壽典禮修明

特恩加級 贈先世如公官慶禮甫成以代賠屆限罷官終京

邸先是公座主阿某坐事妄稱寄頓對簿西曹公以誼篤師門不

忍置辨代賠數萬金公生平無他嗜好於書無所不窺其奉 勅

所成者有歷朝題畫詩全唐文宗史補遺謚法放至居家撰著已

刻未刻不下百數十種最精染翰行草出入二王而得香光神髓

即顏歐虞褚及宋四家莫不研究凡臨摹至數十百本始存之遇
真蹟必撥冗仿寫無間寒暑有規之者答曰此吾養身之具清心
之法也五十年來以此代藥餌矣公在京師時侯門相第必得公
書以為快公亦骫骳酬應不倦公名傾動寰宇而夸酋土司金潁
玉瓚咸欲邀公尺幅以為家寶南中贗手不下數百輩公聞之畧
不計也尤好藏書墨莊芸苑與絳雲傳是埒公性伉直不設城府
雖輕財好施而雅喜節儉敦隣睦族卹廢拯孤不可枚舉卒年七
十有五宗党傷之

第十世 予告大學士 謚文勤公

公諱世倌字秉之號蓮字大宗伯清恪公第四子也自少敏悟過人器宇凝重年十四補邑諸生為曲阜顏公先數所器許壬午舉順天鄉試癸未聯捷成進士由庶常授編修辛卯充山東鄉試副考官又主順天武鄉試癸巳遷宮允甲午遷侍讀充講官起居注典試廣東尋丁生母憂服闋充順天鄉試副考官督學順天歷掌文衡一以清苦自持以禮教導俗清聲著中外壬寅冬仁廟上賓清恪公攀龍髯而逝公自河間試院跣奔痛極君親淚盡骨立憲廟自潛邸素聞公御極即加褒美比之李文貞張文端云元年即蒙召視學江西公入京力求終制得請猶蒙召

見御書躬勞著訓額賜公母載筆清時額賜公以侍讀學士歸甲辰 特旨擢內閣學士來京供職及入 見面諭已有巡撫山東

之命為汝擇十九日啟行時蓋糧艘阻淺蝗蝻大作也公七日至臨清以在道情形奏乃從田父僱薄板車周行密訪具知其略而後視事分檄勸懲一切捕蝗疏治之法洞若觀火蒞東二載餘剔除漕弊查補虧額行朱子社倉法活被水窮黎廣植果樹以足食嚴禁左道惑民緝獲沂水巨盜豁濟南沉滯命案脩築安山南旺湖隄疏濬膠河淤淺凡所條奏俱荷 允行一切善政迄今利賴丙午丁母憂 上令假回事畢回任旋蒙 改命督修江南水利尋以工有遲悞鑄職仍 令督濬吳淞白茆諸鉅工仰承 聖意

悉得發帑辦理絲毫不費民財形民力也繼又命督修文廟
孔林蓋惟公廉潔克勤仍邀任使如是純廟龍飛授副都
御史戊午陞少司農歷署吏禮貳卿己未陞總憲先後職風紀遇
事直言俱荷聖主優容嘉納庚申晉大司空辛酉七月拜文淵
閣大學士自副憲至入閣甫及七載遷除之速故事未有也壬戌
秋淮揚大水數陳數事上以公熟悉籌河命偕督臣往度形
勢跋涉水陸見河身墊高海口紆曲悉請疏濶正月請假旋里奏
道經山東及沛邑就獲大盜關訊需時請勅撫臣就案速結毋
稽顯戮上是其言十月還朝加宮保命紫禁城騎馬自是秋
彌春巡或扈蹕或命在京總理倚任至重也戊辰冬以票審

字誤罷歸庚午祝

萬壽復職辛未迎

鑿

御書綸扉耆宿額

以賜復

召入閣壬申甲戌兩充會試總裁丁丑十二月以衰老

乞休且欲為生母改營葬地

上稱公齒宿望高宣勞久任特晉

太子大傅允其歸田

賜詩寵行

聖慈諒篤情見乎詞并令春

融安行及春陛辭

賜內庫五千金頒宴百筵

命王公三品以

上大臣就第飲餞所過地方官送迎在家食俸大吏時加存問

恩遇之隆為近代所罕觀公隨臥病疊蒙

賜參

遣醫令再從

容就道四月薨於

賜第高壽七十有九

上聞震悼立遣內大

臣奠醊

賜喪費貳千兩祭葬如禮謚曰文勤自公在官又嘗奉

使祭告者三讀卷者四預脩

大清通禮

玉牒

國史

典訓

諸鉅製又先後拜 賜御筆扇幅字畫 欽定書帖黑狐豐貂人
參上駟清供珍膳緞罽方物更自壬申每卒歲 賜銀五百至八
百皆不勝紀壬午以來 特頒墓祭四次尤曠典云公自芳聞論
性命之旨輒心嚮往過庭之訓既深且于理學名儒多所折節資
其益焉故其督學畿甸也每舉正學心源為諸生開導輯養正初
訓為小學定初基又刻閨範類編以勸節孝其撫山左也手著條
約勸誡頒布六郡皆切中土風原本禮意嘗服膺呂新吾先生呻
吟語纂刻其精要其副臺憲也踵勒題名記于院其教習庶常也
編刻十賢傳以為儆此立身則先去其自私自利之心服官則急
絕其患得患失之念其中年解任及七十而歸住三年也潛心雜

閩之書旁及陸王辨其同異得失又嘗輯學古錄以備攷鑿釐為六類書高二尺輯建中錄以資政治凡三十二卷他如仁愛叢說教習邪言學辨質疑讀書管見與友言學及門問答之語以及詩文雜著凡已刻未刻共二百餘冊皆公之惠訓不勅嘉言孔彰也唯公懿行所能識記蓋什一焉如學政案臨屬郡下檄而通示正覆試期出撫尤重刑名所至必躬入囹圄查賑而親嘗廠粥治水而日御舴艋以審源滙使輶絕苞苴食二簋勘合夫馬半而足九列議釐正從祀先賢則以本朝湯文正陸清獻朱文端請行在粹對純皇后喪禮熟悉典制上為嘉異在閣以阿睦爾撒納竄入俄羅斯集廷議謂小醜窮竄可聽自斃雖未盡合聖

武神謨而未申俄羅斯之伐所部旋表賊伏冥誅其他謨猷入告
不以語家人也今洪太史亮吉更生集紀公每入見凡涉民生

利弊痛切指陳輒至流涕

上嘗顧謂侍臣曰陳某又為百姓哭

矣公性甘澹泊不異寒素一切服御隨所有而用之不擇美惡少
壯至老如一日僮婢俱衣布紵邸第有農家風都下有富匠子籲
公卿弔其喪酬千金最尊者一再倍為御史所彈及按簿不到者
絕少公其一焉平居接人極其謙下然竊見公在西湖宮門對
諸巨公肆應便便剖決如流而氣度恢如無少貶抑焉處事無論
朝野不激不隨惟義所在友朋燕見輜軒所歷諮訪率皆民生休
戚或四方小有痲癘弊政如疾病之在身必去之而後已嗚呼力

行如公有古大儒之概甯特以桓圭衮裳貴哉今 朝廷立傳
國史真那家之光矣

第十一世編修闇齋公

公諱世侃字行之大宗伯清恪公第五子也幼穎異疑重無穉習嗜讀書年十三與兄文勤公並受知于學使顏公光數時有二難之目康熙甲申遭生母周太安人喪哀毀至嘔血數升貽為痼疾戊子與叔兄換吾公偕舉于鄉癸巳成進士改庶常直武英殿承纂萬姓統譜散館授檢討承修周易折中丁酉充山西副考官清白自矢搜剔無遺焉戊戌清恪公卧病京邸諸兄以典試奉使將母適皆去京唯公一人謁醫侍藥衣焦不申行不能正履凡兩閱月而清恪公瘳明年予告顛恩護歸還直承明壬寅清恪公祝釐來都詎薨邸第又唯公獨肩大任哀毀盡禮士大夫咸

嘖嘖稱善及春同兄由潞河扶櫬回籍閉戶讀禮甲辰有怨家忽
搆凶訟事緣公未抵里家奴啟釁雖怨非已樹一旦震厲天來棟
撓心折老母寡嫂益切驚憂公乃毅然以身任之 上意尋悟為
虞典罰金已事而仙籍乍除官逋日迫矣丙午遭母查太夫人喪
歷乙卯積繳未清乾隆丙辰蒙 恩豁免自是歲 恩科至庚午
十五年兒孫三赴鹿鳴繼武詞垣者一膺民社列膠庠又各三人
英英鵲起焉公唯恬退安貧益肆力墳典杜門著述手不釋卷旁
及天文地理諸子百家言無不淹貫辛未迎 鑾冬入祝 釐蒙
恩特賜編修先是公珥筆 內廷書法仰邀 睿鑒至是文勤
公入對特蒙 垂問獎許故得邀異數也隨以次子拜 恩受加

一級封壬申南旋踰峕而奮疾復作終于癸酉享年七十三公性
廉靜果毅勇于為善當清恪公開府湖北適江浙大旱念鄉里乏
食捐資搆米萬斛公為督運浮江直下無程抵家酷暑中親歷村
庄計口授食一時無呼庚癸晚年又勸興育嬰堂收養貧家弃子
規畫盡心遷祖墓祭世遠丁繁公乃建議于化龍騎塘祀田中增
辦飲福三十筵以志收族之誼公子方並列官時咸為公泰公則
手書諄誠內而課之著作外而教以儉廉且令歲奉祿養母及百
緡也所著有三樹堂集地理探源通鑑輯義詳註賦彙題解二十
八卷類韻經緯一百卷

第十一世主政樓霞公

公諱邦懷字尚一號棲霞秀穎敏作文未嘗起草由成均舉康熙
己卯鄉試授工部虞衡司主事蒞任二年部中積弊殪剔殆盡舊
籍新冊必親加稽核在已纖毫無染胥吏亦不冒破甲午充順天
鄉試同考官嚴絕干牘入闈後加意搜羅必求學有根柢詞無枝
葉者拔之公正周慎凡得十五人皆宿學知名之士尋以母疾假
歸教子讀書敦宗睦族鄉黨稱之年四十一卒故其業不克昌云

第十一世莆田令志范公

公諱武嬰字聞野號志范文學愚谷公第三子自幼刻志砥行發憤下帷無間寒暑甫逾冠補諸生康熙辛卯舉于鄉乙未成進士雍正甲辰授陝右雒南令單車就道詢民疾苦禁陋規減火耗清理戶口田賦凋敝之邑頓以改觀蒞任六年以公務罣誤癸丑恩舉廢員試以條陳利弊蒙 恩引見 顧問宰執欲以知府用而未得缺仍授莆田令莆為山海要區案牘冗積吏猾民刁公手自裁決每漏下四鼓乃已作奸者悉置諸法不苛不縱良民感德乾隆初調崇安值歲稔米價騰踊強買截劫者治不少貸捐俸為紳倡設廠賑濟先發後聞民始安集時奉有豁免浮賦之 命公

躍然按冊清查廓清諸弊吏不得欺三任縣尹兩署郡守冰操如一轍歸田後不改儒素孜孜吟誦間為詩古文不自收拾生平以不欺為主無欲為宗端慎以飭躬果決以處事嘗著四不可以無箴以見志性篤孝友敦氣誼周人急若弗及接人和氣盎然有不可輒面斥之祖祠傾圮勅議脩葺祠宇一新如公者所謂儒行循吏兩無愧已

第十一世侍讀愚亭公

公諱邦直字方大號愚亭宮傳大學士文簡公子也公生而敏慧甫三齡授以詩詞應口成誦十歲徧讀諸經大父容菴公鍾愛特甚延呂丹麓黃若木兩先生朝夕督課兩先生嘗謂人曰此子閱數年當令前賢畏後生矣年十四補諸生辛卯年十七領鄉薦旋丁宗太夫人艱居喪戚禮兼至乙未捷南宮改庶常逾年授編修公以少壯登朝深嫉奔競以是供職外第鍵戶讀書而已雍正丙午以詩不稱旨罷職己酉文簡公入閣公亦蒙恩復官命與修國史癸丑八月文簡公致仕公亦陳情歸養即隅陽公別業而重葺之每遇春秋佳日侍奉瞻依色養彌至乾隆丙辰秋文簡公

捐館舍公以哀毀之餘體羸善病杜門養靜文簡公手輯諸書未
竟者續成之已竟者刊行之而於家譜一編尤加意校讐刊成完
書以繼志也歲壬午 純皇帝三舉南巡盛典大吏以海隅僻壤
惟陳園可為清蹕之所公亦以世受 國恩故宜自効爰鳩工庀
材一一躬閱其事以昭慎重觀者多以簡陋為安迨 臨幸之日
轉以樸素無華仰邀 睿賞一時 恩賚稠疊未易悉數復蒙

垂問家世年齒甚詳乙酉 翠華重幸擢公侍讀蓋公仰體 聖
主儉德以盡臣子樸誠故能上契 宸衷獨承 恩眷如此公博
覽載籍尤喜左氏傳及讀禮通考多所發明詩文著作秀逸天成
然自視歛然悅稟後輒棄去不復存晚歲游情繪事工設色花鳥

至敦本睦族樂善好施則終其身不倦丙子歲大侵率先捐資賑濟存活無算丁酉秋以疾終享壽八十有三

第十一世州牧傳香翠軒二公

傳香公諱履長字光庭禮部郎中峻齋公長子也自少時積學攻苦雍正壬子登賢書乾隆丙寅選授四川威遠縣令值開鐵礦察弊懲奸遠商雲集丁卯分校鄉闈稱得士調繁成都委審疑獄多所平反禁囁嚅不得肆橫民賴以安陞眉州知州眉地負山濱江乃脩復諸堰講求水利灌田五萬六千餘畝在成都嘗葺武侯祠及浣花草堂至是復葺蘇文忠文定兩祠及眉山書院延名師教諸生並請增眉學額三名青神彭山各二名士人德之旋以部郎候銓遂歸不復出築宅後小園日招諸名士賦詩命酒優游十餘年以終年六十有九弟翠軒公諱履祥字朗庭雍正丙午先伯兄

舉于鄉歷任江西龍泉星子永甯縣令龍邑虎潭山舊隄久圯田
畝無以資蓄洩公至即為修復歲辛未江右亢旱詳請平糶先發
倉廩後奉憲駁令增價虧值三千緡至鬻已產以償卒無怨心星
邑面臨鄱陽舊設救生船篙師大半市井無賴每乘危取財物公
嚴為簡閱宵小懾服歛手行旅皆頌德焉永甯處萬山中地多荒
廢教令墾植不數年遂成恒產三任疲邑所至均有惠聲卓異陞
雲南建水州牧未之任以疾卒年七十有一二公秉庭訓以孝廉
起家其後俱由邑宰而遷州牧名位亦相埒矣然傳香公罷官後
偃息林下者十餘年而翠軒公累治繁劇積勞成疾而歿則又所
遇之不同也

第十二世州司馬舒菴公

公諱學英元名克莧字東蕃一字舒菴少承腹貞公鼓濤公兩世家學又習聞乾初公緒論飭躬砥行折節讀書文思敏贍以七藝游鹽庠冠一軍入國子監試輒前茅名噪京師授職州同知未赴而歸為人彊毅果敢不為威屈不可犯以非義遇公事侃侃便便族黨推重孝友天至家庭雍肅有太邱風自舊居遷南埭以許同生先生所書蒼筤園榜其楹日事丹鉛沉潛經籍著有周易闡微禮記全編書法古宕道勁直逼晉人族祖香泉公目為俊品其生平行畧載鹽邑續圖經文苑傳子四人長塚孝邑增生學問淹博遊歷半天下手不釋卷著類書半天集又嘗校錄乾初公詩集次

基昌邑庠生洽聞通藝著本草精義次廷表元名人龍邑庠生入
國子監性洒落不羣勇于從義好學能文工詩善書下筆立盡千
言文簡文勤二公咸器重之嘗叅宣府戎幕發徵訓練具見施行
所著見聞雜錄之黔州西樸詩文彙並藏于家

第十二世永昌守外存公

公諱克復字順思號退宜又號外存蚤齡侍大父香泉公與王新城宋西陂諸前輩唱鬲有神童之目弱冠從軍塞外議叙授湖廣常德府清軍同知旋署永州郡篆所至有政聲雍正乙巳召見授大理郡守蒞任五載決獄如神庚戌調任烏蒙旋隨相國鄂公理黔滇軍務宣力行間算無遺策底定後凡建置招徠善後諸大政公實運籌之甲寅題署廣南府篆未浹旬即查勘土州邊境尋赴粵西開修土黃河道明年黔省苗變以勦除功議叙引見奉旨往軍機處詢問從前烏醜變故及陣亡被難諸臣事蹟公引毫伸楮據案疾書雖越十餘年而奏對歷歷不爽隨奉旨仍回雲

南以知府補用戊辰八月署黑鹽井篆明年守楚雄兼署姚安獄
訟多所平反在任四載設施之富莫可殫述能吏之名騰桂林象
郡間辛未冬移守永昌永昌為迤西大郡控制十四土司毗連外
域最為要區上官廉公能故俾公筦鑰焉甲戌春考終官舍年六
十有一統計入滇之期已三十載矣早年殖學於書無所不窺著
退宜詩集若干卷

第十二世平番令

贈通奉大夫鈍菴公

公諱鈺字聲先號鈍菴 贈通奉大夫二復公長子也性地理悟
甫就塾日課千言背誦不誤一字成童遭父喪哀毀如成人旋稟
慈命殫精力學造詣益進雍正甲辰舉鄉試年甫二十九厥後屢
躓公車慨然歎曰士人志存利濟苟得尺寸柄亦可澤及蒼生奈
何守經生業老死牖下乎性故沆爽不屑為田舍計雖瓶無儲粟
晏如也歲在己酉 詔舉賢良方正觀察祝公以公薦蒙 恩旨
發往川省以縣令試用上官諭公為良吏才命攝清溪策旋移巴
縣裁商賈繳帖費凡千百緡商民便之明年補新都值歉歲平糶
親督胥吏視他邑每升浮一指許飢民大悅忌之者詆公出私蓄

以沽美名勿顧也戊午丁母張太恭人艱服闋補甘肅高臺襍被
蹇驢蕭然若寒士量移西甯又調平番番地當孔道軍書旁午自
乾隆甲戌以後八九年間值王師有事伊犁大兵相望于道供
億維艱公則恩義兼施境內肅然若不知有兵者他如撫輯旗卒
矜釋土番代償籽種所在兵民感悅至今尸祝累以卓行著聞而
公亦年逾七十矣時伯子孝凋官矮峒鹽大使仲子孝昇奉命
出守潮州子姪輩並服官政公遂於丙戌歲乞休歸里林泉頤養
日與二三戚友觴詠自娛享壽八十有一公生平慷慨好義重倫
紀篤交友一日天寒歲暮獨行海上遇客立譚契甚向旗亭貰酒
為樂公因慨然論當世事胸中奇盡吐遂傾橐中金贈客為卒歲

計及蒞官聽政不廢聰明而一以正大和平為主嗚呼如公者可
不謂之良吏與

第十二世雲南守粵南公 附出嗣恬齋

公諱鑣字郊君號粵南學博贈中憲大夫學邨公長子也生而穎悟好學年十六補諸生雍正丙午舉于鄉庚戌考授內閣中書既而文勤公登政府迴避外補廣西興業令治行有聲兼署陸川訓撫狼兵率皆感服量移崇善陞歸順牧未蒞任再調甯明首誡父老毋啟邊釁州有趙生者挾資與同庠周德遊及旦周獨歸趙妻訟周殺其夫前刺史拷周誣服公至覆推知趙為盜殺而無証限滿提解力辨其冤于廉使德公至出印請限德公擊節呼况太守馳歸三日竟有羣盜自縛來鞠之盡服遂出周于獄衆驚其奇制府遂舉公堪勝知府乙亥擢知雲南郡任三年護理迤東道兼署

澂江武定所至如履堪地震灾黎捐俸賑濟疏濬金沙江使瘠土
為膏腴裸匪擾邊身出鎮之不煩一兵而靖旱而露禱得雨民呼
為陳公雨已卯學邛公病問至即日陳情歸養上官堅留不可民
遮道馬不能前宵行出境兼程旋里逮事者半載居喪服闋遂不
復出終乾隆丙戌年六十有八公生平簡重燕居必正衣冠不談
人過胸無町畦待人和藹至事關大義侃侃直言不為利害所奪
嘗謂士人非徒屑屑章句臨民要嘗展一日之長故雖以經生起
家而吏治往往稱神焉性尤友愛嘗以第三子繼五弟聲和弟七
且為治葬又隱覘六弟愷五子弱為合葬今得並祀焉○第三子
善繼字裕光號恬齋嗣贈奉直大夫聲和公後天性孝友博極羣

書而于醫學則自母查恭人病甯明署州無良醫恬齋晝夜研窮醫理欲睡則抱書循牆而走揣摩三月豁然通曉毅然進藥而母病起乃嘆曰醫活人術也自是稍稍應人輒奏奇效名噪粵西粵南公陳情歸恬齋就職四川藩庫大使連活上官名復著于成都手著醫書行世粵南公凶問至一慟暈絕而蘇嘔血斗許服闋選長蘆興國場調庫大使乾隆癸巳奉 旨宣召馳驛為治裘大司空曰脩壺症又額駙福公隆安病於密雲差次復奉 召治之皆立痊名益重于都下畿南官民有陳神仙之謠而職守無曠官聲大著制府保薦將陞適齋憲欲令恬齋証監司侵蝕案恬齋不可即掛冠歸恬齋性孝友交誠信好施與即素有隙者來奔亦不

念也祭祀必所後與本生並重且嘗念本宗丁少遺言令子孫應
試登仕版者酌撥歸宗

第十二世泗州牧介年公

公諱韶字鳴盛號介年贈奉直大夫二復公次子也雍正癸卯舉于鄉授直隸樂城令樂為七省通衢差務絡繹供用向發官價採辦公至任悉依民價平買一切陋規盡革清刑獄興文教蒸蒸然有弦歌之化焉秩滿陞天津通判丁內艱服闋補安慶攝亳州北關外石橋為通行要道遭水衝毀民以舟渡為艱公乃捐俸成之往來稱便去亳後民感其德建祠橋側署亳一載大吏重其才題陞壽州知州壽俗强悍事劫殺有孫和尚劉炎者素不奉法為鄉里害公以計縛之置諸理民大快州之安豐塘即楚孫叔敖所開芍陂塘也歲久淤塞公為鳩工疏濬由是環塘田數千頃盡成膏

腴膺卓薦遷泗州泗多水患公按知謝家溝三十里為洩水要道
力請開濬以導其流撫軍會勘如議水患始息民賴以安乾隆十
八年黃流決口闔境被灾公親自督賑設法平糶以蘇民困奉檄
築盱眙高家堰易甌為石刻期甚迫公集徒役購材料櫛風沐雨
者年許率先告竣大吏嘉嘆表其法為各工式蒞泗七載地方事
宜籌畫備至將補郡守需次旋里以疾卒年六十本州志入循吏
傳○長子黃中廣西羅城令重文治重建黌宮擴其規模士子感
德歌詩勒石署永甯州牧兩地恩威並用獯豸懾服○三子時行
山東膠萊鹺判有惠政商民愛戴弟兄友愛晚年歸里尤著雍睦
之風

第十二世華亭令柳堂公

公諱克鎬字芑豐號柳堂副憲存齋公長子也弟秉庭訓言動有法質敏悟好學為文筆不停機楊柴木查次谷諸前輩咸稱為讀書種子年十五補弟子員有聲黌序康熙庚子中順天副榜知己頗為扼腕而公益讀書攻道無倦容雍正癸卯始舉于鄉同年任翼聖戴巨川諸公皆一時譽髦與公針芥投合稱莫逆交嗣因保舉授陝西華亭縣令政尚清簡案牘之暇以詩酒自娛旋署和州牧辦理甘肅軍餉歷數千里運米數萬羽書旁午不避勞瘁總制鄂文端公深加獎賞歸田後頤養林泉手不釋卷子史經籍丹鉛殆徧故學有本原不為勦說於古文喜左史莊騷下逮唐宋諸家

於詩喜昌黎東坡而尤服膺少陵所著有柳堂詩話十二冊自訂
詩稿四集其中詠史覽古諸作尤為全集之冠兼通風鑑星卜諸
術靡不精究乾隆庚子 純皇帝南巡公率陳氏子姓安瀾園迎

駕蒙 恩賞給原品職銜大緞二端癸卯鄉試重赴鹿鳴黃髮

幡然為新貴領袖鄉黨榮之撫軍福公為書品重蘭臺四字以贈
公少年高第不自矜異鍵戶讀書絕不與戶外事一切服御淡泊
自甘與人交抑然自下久而人愈重之教子弟立身處世之道俱
合聖賢名理晚年嘗繪柳堂小照本前賢和中有介之意卒年八
十有四仲子寬早登亞魁諸子俱有文名皆本義方之訓云

第十二世甯化令組雲公

公諱鼎字致和號組雲 贈通奉大夫二復公第三子也由太學
投効河工授湖北麻城令公念先世以來累被 國恩輒思報効
時兩兄俱以名孝廉出宰他省公益自刻勵既至任視事精敏吏
莫能欺遇冤獄力為平反之未嘗為威勢屈先是邑有涂如松者
與妻楊不相能楊避如松毆走匿向所私者馮大家旋為諸生楊
同範取之藏複壁中兩家未之知也並訟于官楊弟五榮遂誣如
松殺妻縣令湯公應求訊無據獄不能具久之同範與五榮謀謬
以男屍報湯覺而置之同範等率眾闕于場事聞總督邁公委廣
濟令高仁傑重檢高阿邁意竟報女屍酷掠如松等俱誣服邁遂

以如松殺妻官吏受贓擬斬絞奏民咸知其寃然卒不得楊氏事亦無由明又久之同範妻患產難邀其鄰媪往助猶不得下妻窘呼三姑救我楊氏聞然從壁間出見媪惶急乃跪媪前戒勿洩同範手十金納媪袖中媪出即屬其子持金訴縣公久知此獄寃苦不得間至是適蒞任聞之即白巡撫吳公吳命白總督邁惡之姑令拘楊氏公陰念若拘稍緩或漏洩必匿他處且殺之滅口獄仍不具也乃偽訪同範家畜娼而身率快手直入毀其壁果得楊氏麻城人數萬歡呼隨之至公堂召如松認妻妻怪其夫焦爛狀直前抱其頸大慟曰吾累汝吾累汝堂下民皆雨泣五榮同範等叩頭乞命無一言時雍正乙卯七月事也吳復以狀奏上特簡大

司徒史公代邁委兩省官會訊一切皆如公議乃釋如松誅同範
等由是邑中稱神明焉後調福建甯化令並有政聲卒年六十有
一 所著有鏡心錄行世

第十二世橫州牧

贈中憲大夫厚巖公

公諱錕字時行號厚岩

贈中憲大夫遂昌學博學邨公第四子

也幼有大志讀書不務章句為諸生輒究心經濟之術雍正壬子
舉于鄉謁選得山東臨朐令尋改金鄉愛民如子救荒多惠政歷
署東平泰安俱以廉明聞于時乾隆己巳調商河勤恤民隱嘗勦
修學宮及城隍廟值歲旱蝗禱雨輒應蝗不為災邑故疲瘠公在
任十年興利除害與民休養期于富而教之間里蒸然向風戊寅
以卓異陞廣西橫州牧時適有濬河之役酷暑中躬視畚揭旦夕
不離工所積勞成疾未出商河而歿年五十有三發喪邸署百姓
感慟事載山東武定府志名宦傳

第十二世侍讀鐵巖公

公諱淦字揚對號鐵巖又號養素居士編脩閻齋公次子也資稟卓異年十一善屬文筆意端重不落纖佹語王父清恪公見而愛之謂其雅近趙明遠王邁人兩先生歷九試至乾隆辛酉舉于鄉明年相國史文靖公薦授國子監助教丁卯京察一等記名陞直隸州牧意不屑也假歸下帷益力戊辰成進士改庶吉士辛未散館授編脩壬申充武英殿提調官癸酉充國史館纂修官旋丁閻齋公憂歸里乙亥服闋就職丙子充通考館纂修官丁丑充殿試受卷官明年以養母假歸庚辰蒙恩起用仍充武英殿提調官乙酉六月陞右中允丙戌轉左旋晉侍讀戊子左遷掌院劉文

正公總憲觀公咸相器重即保舉御史引見記名而公以母熊太
宜人春秋高毅然引退壬辰乞假歸養甲午太宜人病作公年七
十每率諸弟侍奉湯藥雖嚴寒中夜必起及居喪哀毀不異喪父
時然精力自此頓瘁矣庚子 翠華南幸 駐蹕安瀾園公於園
門迎 駕蒙 殊恩賜陳氏子姓各緞疋公獲 加賜雙端時以
閤齋公所輯賦彙題註進呈蒙 恩嘉獎是年冬以疾終年七十
有五公性溫厚生平未嘗有慢容遽色讀書必端坐為文縝密有
法少受業侍講顧小厓先生理學專家與公講論每有針芥之合
因盡發其秘云

第十二世贈通奉大夫郿縣令虛谷公宛平令復齋公

虛谷公諱述祖字紹庭行三復齋公諱基字友其行四皆編修閭
齋公子也虛谷公天資精敏舅氏涿州熊公近智見而愛之以為
嗣弱冠補涿州學生雍正乙卯拔貢 廷試一等引 見 憲廟
特以公與滿州觀公保二人才頗可造就 勅部俟鄉試後另
行請 旨無何 龍馭上賓觀公獲雋公乃需次原班迨乾隆辛
酉投効南河湮滯多年始得如臯丞癸酉遭閭齋公喪時熊公已
得二子爰即歸宗終制服闋署儀徵丞己卯陞山陽令聽訟每諳
切開導至有悔悟感泣而求去者公才本敏達而治獄多矜恤嘗
言庶民一朝受杖終身不齒再世蒙羞可輕施乎旋調盱眙高堰

河工報最既而呈誤丙戌開復隸陝西歷署富平藍田補郿縣陞署郿州牧甲午丁繼母憂丙申終焉年六十有九公倜儻性成應事明決在官無留牘而哀矜勿喜吏畏民懷教子嚴而馭下極恕長子林三子寅先後鄉薦報捷任所人咸謂循吏之報云○復齋公少而誠薦當甲辰從師距杭三十里讀書餘杭山中丙夜不輟學士戚公麟祥見而異之曰陳公有子其无妄何愁不渝安貞吉哉許字以女乾隆壬戌由貢生例授順天府經歷直 謁 陵大典制府特器重公裨以督運資重得仰瞻 長白 興京之勝隨題管三河縣事旋調宛平兩邑皆 輦轂之下 鑿輅清塵王公乘傳時承 大差靡不先勞供職絲毫不以擾民而事無不集越

丁卯因奏銷經費貽誤罷官歸而杜門著述兩次與修邑乘一以
公慎自持不苟徇流俗生平仁厚性成樂善不倦家雖拮据持籌
而夏製藥冬絮衣歲歲施之化龍騎塘兩墓下贍田浸失舊規漸
虞不給乃與族人立議以年歲之豐歉定贍米之等差一切經理
具有良法蓋公于仕宦未殫厥施故其修于家有如此云終庚子
年七十一

第十二世 封通奉大夫國子監學錄雙岷公 附長孫時齋

公諱璵字煥若號雙岷大宗伯清恪公冢孫檢討換吾公長子也
生而岐嶷甫五齡祖母查太夫人以年老病目公隨檢討公侍側
朝夕不離年十歲而檢討公辭世迨十月而清恪公京邸之訃又
至兩遭重喪盡哀盡禮受業孝廉陳文虎先生之門二十年未嘗
一易乾隆甲子舉于鄉兩赴會試壬申甲戌以文勤公總裁迴避
會有 旨令三品以上大臣于舉人進士中簡學行兼優者保舉
國子監助教學錄等官時副憲安州陳公惠華以公名上得
旨錄用甲戌秋補崇志堂學錄丁丑會試報罷旋嬰末疾乞假回
里丙申邑刺史戰公開浚河渠邀公相視於城東南隅建牖一座

以時啓閉水脈流通商民稱便事竣復延修州志採輯無不允當
壬午秋經理風山公祭產七百餘畝悉心稽核履畝清界呈州立
案復酌增規條勒碑砌祠又經理清恪公祭田百餘畝每歲所餘
悉蓄以充公用無纖毫私清恪公著述甚富而公母萬太夫人為
克宗先生女孫經學湛深公承家學兼得外氏之傳以是底蘊純
粹莫窺涯涘時藝以清真雅正為宗課諸孫寒暑不輟嘗品評法
帖自晉唐以迄元明倣高廷禮詩品彙式分五部曰正統曰絕軌
曰會通曰拾遺曰資獻論者謂其鑒別精審在玉烟諸帖上論詩
以和平古雅為主時亦間作旁及醫家地理無不究心以出嗣子
用敷貴 馳封至通奉大夫公雖疊邀 封誥而搗謙自若至老

不哀甥姪輩以時晉謁必携杖步答不御板輿尤人所難卒年七十有一著有閒閒草詩稿其歿也錢方伯琦誌其墓而杭州府志列公文苑傳中 長孫時齋幼不好弄溺苦於學自成童時出語已驚其老宿弱冠遊泮旋餼於庠文名噪甚顧以數竒屢躋名場賫志以歿悲夫時齋內行修絜撫孤叔敬愛彌摯三十年如一日人尤重之節亭為之立傳述其遺事甚悉故不復贅

第十二世慶遠郡守清峙公

公諱琪字其玉號清峙險討換吾公仲子也乾隆丙辰舉于鄉選授廣西馬平令引 見特調湖北漢陽漢上號繁劇公為治不尚苛細庶絕一絲以不能覓應失上官意奏請調簡 恩令送引見改發直隸制府方公噐重焉會以漢陽任案部議降調因留辦屯政三年軍民無擾公粟倍充出考引 見仍用原官又發山東旋補定陶崇學校濬河渠簡科條勤審理利興弊革士民安之丁生母艱起補廣西荔浦時滇南用兵需辦馬匹公慎選調良解赴軍營長途絡繹無一瘦斃大吏薦剡將入 上特擢公慶遠守命下吏部不知所自時體齋方被知府之 命在部未行因開公

歷任職名本部請之軍機處軍機處諮之內記注始知 上以往
時內記名 特用也十日之間叔姪共膺方面知者榮之公亦以
屢蒙 特達恩益勵實心行實政焉郡為苗疆孔道號稱難治公
一以廉靜鎮之歲己丑會送八閩水師赴滇酷暑中經理一切勞
憊成疾而卒年五十六藉公得享長年又將蒙大用焉惜哉